

AUGLÝSING

um staðfestingu á breytingu á aðalskipulagi Reykjavíkur.

Samkvæmt ósk borgarstjórnar Reykjavíkur hefur skipulagsstjórn ríkisins hinn 25. janúar 1989, fallist á og staðfest, sbr. 3. mgr. 19. gr. skipulagslaga nr. 19/1964, breytingu um landnotkun í aðalskipulagi Reykjavíkur 1984–2004. Breytingin er fölginn í því að á staðgreini-reit 4.645.0 og 4.645.1 sem markast af Vesturhólum, Orrahólum og Krummahólum verður íbúðasvæði í stað athafnasvæðis og blandaðrar landnotkunar fyrir útivist, verslun og þjónustu.

Félagsmálaráðuneytið, 7. mars 1989.

F. h. r.

Berglind Ásgeirsdóttir.

Hólmafríður Snæbjörnsdóttir.

Nr. 112

7. mars 1989

AUGLÝSING

um innritunar-, kennslu- og prófgjald vegna námskeiðs og prófs til að öðlast löggildingu til fasteigna- og skipasölu.

Samkvæmt ákvæðum reglugerðar um próf til að öðlast löggildingu til fasteigna- og skipasölu nr. 519/1987 eru gjöld vegna námskeiðs sem halda á fyrri árs helming 1989 ákveðin þessi:

Innritunargjald og kennslugjald III námskeiðshluta	kr. 40 000,00.
Prófgjald III námskeiðshluta	kr. 10 000,00.

Dóms- og kirkjumálaráðuneytið, 7. mars 1989.

F. h. r.

Þorsteinn Geirsson.

Jón Thors.

Nr. 113

9. mars 1989

SAMPYKKT

um sorphreinsun í Mýrdalshreppi.

1. gr.

Mýrdalshreppur annast eða býður út sorphreinsun frá íbúðarhúsnæði, opinberum þjónustubyggingum, atvinnuhúsnæði og sumarbústöðum í Mýrdalshreppi.

Sorphreinsun fer fram undir yfirstjórn sveitarstjórnar og undir eftirliti heilbrigðisnefndar.

2. gr.

Sorp sem fellur til daglega skal láta í sérstaka poka, sem sveitarfélagið afhendir. Pokunum skal komið fyrir í þar til gerðum sorpskáp eða sérstakri grind með viðeigandi

frágangi og loki yfir. Húseigandi ber allan kostnað af uppsetningu og viðhaldi sorpskápa og sorpgrinda, og ber að sjá um að grindur og skápar séu í góðu ásigkomulagi. Sorphirslur skulu vera aðgengilegar fyrir sorphreinsunarmenn og húseigendur skulu hreinsa snjó frá sorpgeymslum, sorpgrindum og sorpskápum á vetrum og halda greiðfærri leið að þeim, svo auðvelt sé að framkvæma hreinsun.

3. gr.

Húseiganda ber að sjá um, að húsi hans fylgi nægilega mörg sorpílát, sem endurnýjuð skulu eftir þörfum. Skal hverju húsi fylgja a.m.k. eitt ílát fyrir hverja íbúð. Húseiganda ber að skipta um poka fyllist þeir milli tæminga og ganga þannig frá þeim að sorp hrynji ekki úr þeim.

4. gr.

Í sorppoka má setja venjulegt heimilissorp, en gæta skal þess sérstaklega að offylla þá ekki né ofþyngja á þann hátt að erfitt verði að loka þeim eða að hætta sé á að þeir rifni. Sorp skal láta vel ofan í poka, varast að það hangi yfir pokarönd eða dreifist umhverfis sorphirslur og valdi óþrífum. Öllu blautu sorpi svo og oddhvössum hlutum skal pakkað vel inn áður en slíkt er sett í sorpílát.

Mold, mól, grjót og svipuð efni má ekki setja í sorppoka, heldur skal flytja þau á ákveðið svæði samkvæmt nánari fyrirmælum sveitarstjórnar og heilbrigðisnefndar. Á sama hátt má ekki setja eldfima vökva, svo sem olíu og bensín í sorpílát, hvorki laust né í umbúðum. Sorphreinsunarmönnum er heimilt að skilja eftir poka sem fylltir eru um of, rifnir eða svo þungir að hætta sé á að þeir rifni.

5. gr.

Hreinsun sorps skal að jafnaði fara fram einu sinni í viku. Hreinsunarmenn afhenda nýja poka í stað þeirra sem þeir taka. Fjöldi afhentra poka skal miðaður við reynslu, þannig að nægi að jafnaði milli hreinsana. Húseigendur eiga rétt á að fá poka gegn greiðslu umfram framangreint magn.

6. gr.

Sorphreinsunarmenn annast hreinsun á öllu sorpi sem er í pokum, einnig tilfallandi eðlilegum úrgangi, svo sem umbúðum af heimilistækjum og hlutum, sem rúmast illa í pokum, enda séu þessir hlutir auðveldir í meðförum fyrir einn mann. Allt umfangsmeira sorp, svo sem frá byggingum og málmiðnaði, bílhrae og allt brotajárn, skal hver hlutaðeigandi fjarlægja á eigin kostnað á ákveðið afmarkað svæði, samkvæmt nánari fyrirmælum sveitarstjórnar og heilbrigðisnefndar.

Bannað er að urða olífuleifar og önnur efni, sem mengað geta jarðveg. Skal slíku sorpi brennt eða því eytt á annan hátt, eftir því sem kostur er og skal slík eyðing fara fram undir eftirliti heilbrigðisnefndar.

7. gr.

Einu sinni á ári skal fara fram flutningur á garðsorpi og öðrum úrgangi, sbr. 4. gr. og 6. gr. húseigendum að kostnaðarlausu. Skal sá flutningur fara fram að vori og skal sveitarstjórn auglýsa rækilega fyrirkomulag og tímasetningu flutninganna.

8. gr.

Við flutning á hvers konar sorpi, úrgangi, jarðefnum og öðrum lausum efnum skal þess gætt, að þannig sé um flutningana búið að eigi sé hætta á að fjúki eða falli af flutningstæki.

9. gr.

Allur kostnaður við almenna sorphreinsun greiðist af sveitarsjóði. Fyrir hverja íbúð skal greiða eitt sorphreinsunargjald á ári, en 1/2 gjald fyrir hvern sumarbústað. Fjöldi hreinsunar-

gjalda fyrir opinberar þjónustubyggingar, svo sem verslanir og iðnfyrirtæki skal fara eftir mati á umfangi sorphreinsunar frá þessum stöðum. Mat þetta annast sveitarstjórn. Upphæð gjalds samkvæmt grein þessari skal ákveðin í sérstakri gjaldskrá, sem heilbrigðismálaráðherra staðfestir.

10. gr.

Hafi húseigandi fram að færa kvörtun vegna sorphirðunnar skal hann koma slíkri kvörtun til skrifstofu Mýrdalshrepps.

11. gr.

Brjótí húseigandi gegn ákvæðum samþykktar þessarar um meðferð og geymslu sorps skulu hreinsunarmenn tilkynna það skrifstofu Mýrdalshrepps. Skulu heilbrigðisfulltrúi eða heilbrigðisnefnd hlutast til um að húseiganda verði gert að ráða bót á slíku innan tiltekins frests og geta sorphreinsunarmenn neitað að taka sorp hjá viðkomandi fyrir en úr hefur verið bætt. Sorphreinsunarmönnum er óheimilt að hnýsast í sorppoka eða hirða úr þeim muni.

12. gr.

Með broti gegn samþykkt þessari skal farið í samræmi við ákvæði laga nr. 81/1988 um hollustuhætti og heilbrigðiseftirlit.

13. gr.

Ofangreind samþykkt hreppsnefndar Mýrdalshrepps staðfestist hér með skv. 22. gr. laga nr. 81/1988 um hollustuhætti og heilbrigðiseftirlit til þess að öðlast þegar gildi við birtingu.

Ákvæði til bráðabirgða.

Húseigendur í Mýrdalshreppi skulu útvega sér ílát fyrir sorppoka sem allra fyrst, í samræmi við 2. gr. og eigi síðar en 15. júní 1989.

Heilbrigðis- og tryggingamálaráðuneytið, 9. mars 1989.

Guðmundur Bjarnason.

Ingimar Sigurðsson.

GJALDSKRÁ

fyrir sorphreinsun í Mýrdalshreppi fyrir árið 1989.

1. gr.

Upphæð sorphreinsunargjalds í Mýrdalshreppi fyrir árið 1989 skal vera kr. 5 850 sbr. 9. gr. samþykktar um sorphreinsun í Mýrdalshreppi frá 9. mars 1989. Gjaldið skal innheimtast með fasteignagjöldum.

2. gr.

Ofangreind gjaldskrá hreppsnefndar Mýrdalshrepps staðfestist hér með skv. 22. gr. laga nr. 81/1988, um hollustuhætti og heilbrigðiseftirlit með ofangreindum gildistíma.

Heilbrigðis- og tryggingamálaráðuneytið, 9. mars 1989.

Guðmundur Bjarnason.

Ingimar Sigurðsson.